

BOSNA I HERCEGOVINA
FEDERACIJA BOSNE I HERCEGOVINE
VRHOVNI SUD
FEDERACIJE BOSNE I HERCEGOVINE
Broj: 070-0-Su-26-000018
Sarajevo, 05.03.2026. godine

Na osnovu člana 31. stav 1. Zakona o sudovima u Federaciji Bosne i Hercegovine ("Službene novine FBiH", broj: 38/05, 22/06, 63/10, 72/10-ispr., 7/13, 52/14 i 85/21), člana 8. tačka j) Pravilnika o unutrašnjem sudskom poslovanju ("Službeni glasnik BiH", broj: 66/12, 40/14, 54/17, 60/17 ispravka, 30/18, 83/22), u vezi sa članom 14. stav 1. Zakona o zaštiti ličnih podataka („Službeni glasnik Bosne i Hercegovine" broj 12/25), u postupku implementacije Zakona o zaštiti ličnih podataka, v.d predsjednice Vrhovnog suda Federacije Bosne i Hercegovine donosi sljedeća:

PRAVILA PRIVATNOSTI

Cilj Pravila privatnosti Vrhovnog suda Federacije Bosne i Hercegovine (u daljem tekstu VS FBIH) u skladu sa članom 14. Zakona o zaštiti ličnih podataka (u daljem tekstu Zakon), je da svim osobama čije lične podatke obrađuje pruži osnovne informacije o navedenoj obradi na transparentan način.

1. Pravni osnov za obradu ličnih podataka

Vaše lične podatke VS FBIH obrađuje u skladu s članom 8. stav 1. tačka c) i e) Zakona, izvršavajući svoje pravne obaveze i ovlaštenja.

2. Svrha obrade ličnih podataka

2.1. Vaše lične podatke Sud obrađuje ispunjavajući svoje pravne obaveze u skladu s članom 8. stav 1. tačka e) Zakona u svrhu:

- zapošljavanja u VS FBIH,
- odgovora na zahtjeve za slobodan pristup informacijama,
- evidencije stranaka, njihovih zakonskih zastupnika i punomoćnika, notara i drugih osoba koje se evidentiraju u informacijski sistem za automatsko upravljanje predmetima (CMS),
- upisa podataka u druge evidencije koje VS FBIH vodi na osnovu zakona,
- izrade ostalih dokumenata u okviru realizacije naloga utvrđenih od strane Visokog sudskog i tužilačkog vijeća Bosne i Hercegovine.

2.2. Vaše lične podatke VS FBIH obrađuje na osnovu legitimnog interesa iz člana 8. stav 1. tačka f) Zakona u svrhu:

- učestvovanja sudija, sudskih stručnih savjetnika, državnih službenika, namještenika i drugih zaposlenika VS FBIH na edukacijama i predavanjima,
- učestvovanja drugih osoba koje nisu zaposlenici VS FBIH, u slučajevima kada VS FBIH organizuje edukacije, predavanja ili slične aktivnosti.

3. Prava nosioca podataka u vezi sa obradom ličnih podataka

U skladu sa Zakonom o zaštiti ličnih podataka, nosioci podataka imaju sljedeća prava:

- **Pravo na pristup ličnom podatku** - u okviru ovog prava mogu se tražiti informacije o svrsi obrade, kategoriji ličnog podatka koji se obrađuje, predviđenom roku u kojem se čuva lični podatak, primocu ili kategorijama primalaca kojima je lični podatak otkriven ili će biti otkriven.
Pristup ličnom podatku može biti ograničen samo u slučajevima kada je posebnim zakonom propisano ograničenje.
- **Pravo na ispravak ličnog podatka** - pravo zahtijevati ispravljanje ili dopunjavanje netačnog ličnog podatka ako podatak nije tačan i potpun. U zahtjevu navesti šta nije tačno i potpuno te u kojem smislu bi trebalo navedeno ispraviti te dostaviti potrebnu dokumentaciju u prilog svojih navoda.
- **Pravo na prigovor** - pravo u svakom trenutku podnijeti prigovor kontroloru podataka na obradu ličnog podatka u skladu s članom 8. stav 1. tačka e) ili f) Zakona, uključujući profiliranje utemeljeno na tim odredbama.
- **Pravo na brisanje** - ako lični podatak više nije potreban za svrhu za koju je prikupljen, ako je nosilac podatka povukao saglasnost na kojoj je obrada utemeljena, ako je nosilac podatka uložio prigovor na obradu u skladu s članom 23. stav 1. Zakona i ne postoje zakonski razlozi za obradu ili je nosilac podatka uložio prigovor na obradu u skladu s članom 23. stav 2. Zakona, ako je lični podatak nezakonito obrađen, ako ne postoje drugi pravni osnov za obradu podataka.
- **Izuzeci za ostvarivanje prava na brisanje** - radi ostvarivanja prava na slobodu izražavanja i informisanja, radi poštivanja zakonske obaveze kojom se zahtijeva obrada propisana posebnim zakonom, a koja se primjenjuje na kontrolora podataka ili radi izvršenja zadatka koji se obavlja u javnom interesu ili u izvršenju službenih ovlasti dodijeljenih kontroloru podataka, u svrhe arhiviranja u javnom interesu, u svrhe naučnog ili povijesnog istraživanja ili u statističke svrhe u skladu s članom 56. stav. 1 Zakona, u mjeri u kojoj je vjerojatno da se pravom iz stava 1. može onemogućiti ili ozbiljno ugroziti ostvarivanje ciljeva te obrade ili radi postavljanja, ostvarivanja ili odbrane pravnih zahtjeva.

Za ostvarivanje svojih prava možete se obratiti VS FBiH pismeno ili elektronskom poštom na naznačenu adresu. Ako ste nezadovoljni postupkom VS FBiH možete se obratiti nadležnom nadzornom organu Agenciji za zaštitu ličnih podataka www.azlp.ba.

4. Tehničke i organizacione mjere zaštite ličnih podataka

U ovom sudu su osigurane odgovarajuće tehničke i organizacione mjere zaštite kako bi se spriječio neovlašten pristup, gubitak, zloupotreba ili neovlašteno otkrivanje ličnih podataka. U cilju zaštite lica i imovine, kao i obezbjeđenja sigurnosti prostora, u VS FBIH postoji video nadzor koji se provodi u skladu sa članom 27. Zakona o sudskoj policiji u Federaciji Bosne i Hercegovine („Službene novine Federacije BiH“, broj 77/20) i Odlukom o primjeni video nadzora na objektima i prostoru koji osigurava Sudska policija u Federaciji Bosne i Hercegovine broj 070-0-Su-Sp-25-000073 od 30.12.2025. godine. Lica koja ulaze u prostoru pod video nadzorom su o tome jasno obaviještena putem vidno istaknutog obavještenja. Pored ovih mjera, naši zaposlenici su u obavezi da čuvaju povjerljivost svih podataka koje saznaju prilikom obavljanja svog posla, a VS FBIH će svakako kroz edukacije zaposlenika raditi na kontinuiranom podizanju svijesti o zaštiti ličnih podataka.

5. Prenos ličnih podataka drugim kontrolorima podataka

Vaše lične podatke sud prenosi drugim kontrolorima podataka-pružaocima informatičko-komunikacijskih usluga sa kojima ima sklopljen ugovor i na način da se poštuju pravila postupanja sa ličnim podacima. Lične podatke sud će dati trećoj strani ukoliko je to potrebno za izvršavanje zakonom propisanih obaveza treće strane ili ukoliko je to neophodno za izvršavanje legitimnih interesa treće strane. Vaše lične podatke VS FBIH neće prenositi trećim licima u inostranstvu, osim ukoliko takva obrada nije neophodna na osnovu međunarodnog propisa ili ugovora koji ga obavezuje.

6. Vremenski period čuvanja ličnih podataka

Lični podaci se čuvaju onoliko koliko je potrebno za svrhu zbog koje se obrađuju. Lični podaci se mogu čuvati i duži vremenski period nakon prestanka svrhe za koju se obrađuju, na način da se čuvaju u arhivi onoliko vremena koliko obavezuju zakonski propisi o arhivskoj građi.

7. Izmjena Pravila privatnosti

VS FBIH zadržava pravo izmjene i dopune ovih Pravila privatnosti u skladu sa izmjenama zakonskih propisa ili u skladu sa praksom. Sve izmjene će biti objavljene na web stranici suda u skladu sa principom transparentnosti.

8. Podaci o kontroloru podataka

Vrhovni sud Federacije Bosne i Hercegovine,
ul: Valtera Perića 15. 71000 Sarajevo;
tel: +387 33 226-751;
fax: ++387 33 226-755
e-mail: kabinet.vsfbih@pravosudje.ba

9. Službenik za zaštitu ličnih podataka

e-mail: szlp@vstbih.ba

tel: +387 33 226-751

Službenik za zaštitu ličnih podataka u VS FBIH ne daje pravne savjete drugim kontrolorima i obrađivačima. Njegova osnovna uloga je davanje savjeta i preporuka o obradi ličnih podataka rukovodstvu i zaposlenim VS FBIH, koji rade na poslovima obrade ličnih podataka, te nosiocima ličnih podataka čiji lični podaci se obrađuju od strane VS FBIH (podnosioci prigovora, podnosioci prijave, zaposleni i sl.)



v.d Predsjednice
Vrhovnog suda Federacije
Bosne i Hercegovine

Dugonjić B.
Dugonjić mr. Božidarka